

四庫全書

子部

欽定四庫全書

格致鏡原卷六十五

大學士陳元龍撰

木類二

桐

總論 瑞應圖王者任用賢良則梧桐生於東廂 禮
斗威儀君乘火而王其政平梧桐常生 顏氏家訓有
諱桐者呼梧桐爲白鐵樹 清異錄同州郃陽縣劉靖
家兄弟不異居西廊梧桐生穀枝鄉人號桐爲小義

酉陽雜俎歷城房家園齊博陵君豹之山池其中雜樹
森竦或有人折其桐枝者君曰何爲傷我鳳條自後人
不復敢折 淮南子桐木成雲注取十石瓮滿以水置
桐其中蓋之三四日間氣如雲作 柳宗元霹靂琴贊

序琴莫良於桐桐之良莫良於生石上 丹鉛總錄東
坡云凡木本實而末虛惟桐反之試取其小枝削之皆
堅實如蠟而其本皆虛故世所以貴孫枝者貴其實也
桐譜桐體濕則愈重乾則愈輕生時以斧斫之甚易

乾乃軟而拒斧諺曰輕是桐重是桐難斫亦是桐 伏
虔古今注昭帝元鳳三年馮翊人獻桐枝長六尺九枚
枚一葉也 易緯桐枝濡毳而又空中難成易傷須成
氣而後華 周書清明之日桐始華不華則歲有大寒
蔡邕月令桐木後華故曰始 羣芳譜四月開花嫩
黃小如棗花墜下如醖五六月結子莢長三寸許五片
合成老則開裂如箕名曰橐鄂子綴其上多者五六少
者二三大如黃豆雲南者更大皮皺淡黃色仁肥嫩可

生噉亦可炒食

南方草木狀梧桐子似乳綴其橐多

或五六少或二三故飛鳥喜巢其中昔人謂空門來風
桐乳致巢是也 遁甲書梧桐可知月正閏歲生十二

葉一邊六葉從下數一葉爲一月有閏則十三葉視葉
小處則知閏何月立秋之日如某時立秋至期一葉先
墜 鴻書世嘗言金井梧飄以葉上有黃圈文如井故
曰金井非井欄也 異苑吳平州門外忽生一株青桐
上有歌謠聲平惡伐之平隨軍北虜三載死桐忽自還

立故根上聞空中似歌曰死樹今更青吳平尋當歸道
聞殺此樹已復有光輝吳尋歸

詳類 禹貢徐州貢嶧陽孤桐注特生也材中琴瑟

枚乘七發龍門之桐高百尺而無枝 張景陽七命寒

山之桐出自太冥 謝靈運遊名山志吹臺有高桐皆

百圍嶧陽孤桐方此爲劣 埤雅梧一名櫬即梧桐也

今人以其皮青號曰青桐華淨妍雅極爲可愛故多近
齋閣種之 詩義疏梓實桐皮曰椅今人曰梧桐也有

白桐有青桐有赤桐雲南牂牁人織以爲布 廣志驃

國有白桐木其華有白毳取其毳淹漬緝織以爲布

華陽國志益州有梧桐木其華采如絲人績以爲布名

曰華布 埤雅賈思勰曰白桐無子冬結似子者乃是

明年之華房爾雅曰榮桐木即此是也桐木華而不實

故曰榮桐木也今亦謂之華桐華則以其華而不實賈

思勰曰桐華華而不實者曰白桐實而皮青者曰梧桐

今炒其實噉之味似菱芡桐有三輩青白之外復有岡

桐即油桐也生於高岡今亦謂之岡梧 西京雜記上

林苑桐三椅桐梧桐荆桐 陳荔桐譜紫花者名紫桐

花如百合實堪糖煮嚼白花者名白桐類穀花而不實

白者葉圓大尖長花先葉而開紫者理細性緊拔生不

及白花者之易一種油桐名膏桐實可壓油一種刺桐

文理細密性喜折裂花側專如掌體有巨刺如櫟樹實

如楓一種頰桐身青葉圓大而長高三四尺即有花花

色紅如火無實一種人家庭苑所植名梧桐皮白葉青

子可噉 羣芳譜白桐一名華桐一名泡桐葉三杈大
徑尺最易生長皮色粗白木輕虛不生蟲蛀岡桐一名
荏桐一名罌子桐一名虎子桐樹小長亦遲早春先開
淡紅花實大而圓每實中二子或四子大如大楓子肉
白味甘食之令人吐人多種之取子作桐油入漆海桐
生南海及雷州近海州郡亦有之葉大如手作三花尖
長青不凋皮若梓白而堅韌可作繩入水不爛 漢書
西域傳車師國多胡桐注孟康曰胡桐似桑而多曲師

古曰胡桐亦似桐不類桑也蟲食其樹而沫出下流者俗名爲胡桐淚言似眼淚也可以汗金銀工匠皆用之事物紺珠楊桐葉細冬青臨水生者尤茂寒食採葉染飯色青而有光可資陽

梓 附楸

事物原始按梓似桐葉小花紫無子者爲楸楸之白色而生子者謂之梓梓實桐皮曰椅大同而小異也 卑雅梓爲木王蓋木莫良於梓故書以梓材名篇禮以梓

人名匠也 禮斗威儀君乘火而王其政和平梓爲長
生 玄中記凡梓木爲楹居下則木鳴謂之爭位 山
海經玉山碧山多梓木雞山美梓 拾遺記始皇起雲
明臺窮四方之珍木東得岼雲之梓北得陰坂文梓
搜神記宋康王以韓朋妻美而奪之使朋築青陵臺然
後殺之其妻請臨喪遂投身而死王令分埋臺左右期
年各生一梓樹及大枝條相交有二鳥哀鳴其上因號
之曰相思樹 列異傳武都故道縣有怒特祠云神本

南山大梓也昔秦文公伐之樹瘡隨合乃遣人持斧斫之猶不斷一人傷足不能去臥樹下聞鬼相與言曰秦公必不休荅曰其如我何又曰赤仄跋於子何如乃默無言臥者以告令士皆赤衣隨所斫以仄跋樹斷化爲牛以騎擊之騎不勝或墮地髻解被髮牛畏之入水

楸 齊民要術白色有角者名角楸又名子楸黃色無子者爲柳楸世人見其木黃呼爲荆黃楸 羣芳譜楸生山谷間今處處有之與梓樹本同末異一種刺楸樹

高大皮色蒼白上有黃白斑點枝間多大刺葉薄
雅楸有行列莖幹喬聳凌雲華高可愛至秋垂條如線
俗謂之楸線 陸璣詩疏楸屬其樹葉木理如楸山
楸之異者今人謂之苦楸濕時脆燥時堅今永昌又謂
鼠梓漢人謂之楸 爾雅疏槲山楸也亦如下田楸耳
皮葉白色亦白材理好宜爲車板能濕宜陽共北山多
有之 本草五加皮樹本是白楸其上有葉如蒲葉者
其葉三花是雄五葉花是雌一名豺漆一名豺節俗名

爲追風使

爾雅注楸細葉者爲榎老而皮粗皴者爲

楸小而皮粗皴者爲榎

埤雅榎櫟也亦楸屬葉大而

早脫故謂之楸葉小而早秀故謂之榎

爾雅翼九章

望長楸而太息室屋之間有此木則餘材皆不復震其

葉可以飼豕肥碩三倍

述異記中山有楸戶掌楸木

者楸可爲什器

熙朝樂事立秋之日男女咸戴楸葉

以應時序或以石楠紅葉剪刻花瓣撲插髻邊

楊慎

外集汝州楸樹極多富鄭公知州時手植數百本於後

圃後人思其政建鄭公堂於楸林之下每立秋日太陽未升時采其葉熬爲膏傅瘡瘍立愈謂之楸葉膏有人患發背腸胃可窺百方不差一醫生用楸葉膏傅其外又用雲母作小丸服盡四兩止不累日雲母透出膚外與楸葉膏相著瘡遂差

榆

總論 運斗樞玉衡星散爲榆 管子五沃之土其榆條長 雜五行書舍北種榆九株蠶大得 齊民要術

榆十五年後中爲車轂及蒲萄甕 北史桓帝曾中蠱

嘔吐之地仍生榆參合陂土無榆時人異之 清異錄

同州郃陽縣劉靖家兄弟不異居宅旁榆樹生桑鄉人

號榆爲義祖 清異錄金鄉路上一老榆往來者就樹

下易草屨例以其舊懸而去行人指爲韉鞋樹 淮南

萬畢術八月榆糯令人不饑 漢書天文志成帝河平

元年旱傷麥民食榆皮 春秋元命苞三月榆英落

崔氏月令榆錢可羹又可蒸糕餌收至冬可釀酒淪過

曬乾搗羅爲末鹽水調勻日中曝曬可作醬即榆仁醬也
北史魏時河南人常笑河北人好食榆葉及元杲
反青州河北流人悉從之故齊人號之爲諧榆賊

名類 廣志有姑榆有郎榆郎榆無英村人任車用至
善蠶者出渤海東光以供官 庶物異名疏周禮壺涿

氏云若欲殺其神則以牡槀午貫象齒而沈之牡槀榆
木也宋景濂謂許遜鑄鐵柱以鎮蛟穴即牡槀象齒之
遺意也 爾雅無姑其實夷注無姑姑榆也生山中葉

圓而厚剝取皮合漬之其味辛香所謂蕪荑 說文榆
有刺莢曰蕪荑又曰蘊莖 范子計然蕪荑出地赤心
者善 埤雅粉白榆先敷葉後着莢榆性扇地所扇各
與木等 博物志食粉榆則眠不欲覺 羣芳譜榆一
名零有數十種今人不能別惟知莢榆白榆刺榆榔榆
數種而已莢榆白榆皆大榆也有赤白二種白者名粉
木甚高大未葉時枝上先生瘤纍纍成串及開則爲榆
莢生青熟白形圓如小錢故又名榆錢甚薄中仁有殼

榆莢開後方生葉似山茱萸葉而長尖稍潤澤 事物
紺珠朗榆如榆皮有滑汁秋生莢 鄭樵通志櫟乃榆
類其實亦如榆錢鄉人採其葉爲甜茶 羣芳譜櫟一
名櫟柳一名鬼柳多生溪澗水側木大者高四五丈合
二三人抱葉似柳非柳似槐非槐材紅紫作箱案之類
甚佳

楊柳

總論 說文楊蒲柳也從木易聲柳小楊也從木卯聲

種樹書順插爲柳倒插爲楊 本草陳藏器曰江東人通名楊柳北人都不言楊楊樹枝葉短柳樹枝葉長李時珍曰楊枝硬而揚起故謂之楊柳枝弱而垂流故謂之柳蓋一物二種也 開河記煬帝開河成虞世基請用垂柳栽於兩隄上栽畢帝御筆賜垂柳姓楊曰楊柳也 詞林海錯陸龜蒙詩手攜鞞鞞佞若在中印國鞞布頂反鞞大各反唐言楊柳也 荆楚歲時記今州里風俗望日祭門先以楊柳枝插門邊楊柳枝所指仍

以酒脯飲食及豆粥插箸而祭之 蜀都雜抄楊柳多
寄生狀類冬青亦似紫藤經冬不凋春夏之交作紫花
散落滿地省衙前有數株冬月望之榮枯各異

楊 周易枯楊生稊注稊者楊之秀也 齊民要術楊
性勁直堪爲屋材寧折終不曲撓柳性懦軟久無不曲
比之白楊不如遠矣 古今注白楊葉圓青楊葉長移
楊圓葉弱蒂微風則大搖一名高飛一名獨搖又有赤
楊霜降則葉赤材理亦赤白楊處處有之北土尤多種

於墟墓間株大葉圓如梨皮白木似楊故名白楊 羣
芳譜楊有二種一種白楊葉芽時有白毛裹之及盡展
似梨葉而稍厚大淡青色背有白茸毛蒂長兩兩相對
遇風則簌簌有聲 清異錄劉靖家兄弟不異居墳中
白楊生檜鄉人號白楊爲義孫 埤雅世重黃楊以其
無火或曰以水試之沉則無火取此木必於陰晦夜無
一星則伐之爲枕不裂爲梳不積垢 彙苑詳註黃楊
木理堅而細其色黃俗說歲長三寸遇閏則退一寸東

坡詩云園中草木春無數惟有黃楊厄閏年 酉陽雜

俎青楊木出峽中爲牀臥之無蚤 羣芳譜青楊樹比

白楊樹較小亦有二種一種梧桐青楊身亦聳直高數

丈大者徑一二尺材可取用葉似杏葉而稍大色青綠

其一種身矮多岐枝不堪大用 事物紺珠松楊高大

葉如梨又名涼木

柳 埤雅柳柔脆易生之木與楊同類雖縱橫顛倒植

之皆生 大戴禮正月柳莢注莢發葉也 神農本草

經柳花一名柳絮 草木狀柳宜下田 齊民要術陶
朱公曰種柳千樹則足柴十年以後髧一樹得一載歲
髧二百樹五年一周 中朝故事曲江池畔多柳亦號
柳衙 唐書王維別墅在輞川有柳浪 景龍文館記
唐制上巳祓楔賜侍臣細柳券云帶之免蠱毒瘟疫
三峯集李固言未第前行古柳下聞有彈指聲固言問
之曰吾柳神九烈君也用柳汁染子衣矣科第無疑果
得藍袍當以棗糕祀我固言許之未久狀元及第宣

室志有人於古宅遇柳將軍者驗之乃一株枯柳爾

通志柳曰天棘杞柳亦曰澤柳 陸璣詩疏杞柳生水

旁樹如柳葉粗而白色木理微赤故今人以爲車轂今

衛北淇水旁魯國泰山汶水邊純杞也蒲柳有兩種皮

正青者曰小楊其一種皮紅正白者曰大楊其葉皆長

廣似柳葉皆可以爲箭幹故春秋傳曰董澤之蒲可勝

既乎 古今注蒲柳生水邊葉似青楊俗所謂楊柳也

亦曰移柳亦曰水楊支勁韌任大用 花木考金絲柳

出鳳縣宋元豐間有旨下鳳州取金絲柳一百根植宮
中詩話漢苑中有柳狀如人號曰人柳一日三起三
倒南史齊劉悛之爲益州獻蜀柳數株枝條甚長狀
若絲縷武帝以植於太昌靈和殿前嘗賞玩咨嗟曰此
楊柳風流可愛似張緒當年羣芳譜其長條數尺或
丈餘孌孌下垂者名垂柳木理最細膩又一種幹小枝
弱皮赤葉細如絲縷婀娜可愛一年三次作花花穗長
二三寸色粉紅如蓼花名檉柳一名赤檉一名河柳一

名三眠柳一名觀音柳一名長壽仙人柳即今俗所稱
三春柳也 爾雅翼檉葉細如絲天將雨檉先起氣應
之一名雨師或曰檉得水則垂如絲故曰雨絲譌爲雨
師 山海經沃民之國有白柳 漢地里志信都國扶
柳注其地有扶澤澤中多柳故曰扶柳 五雜組閩中
有一種柳其葉如松而垂長數尺其榦亦與柳不類俗
名爲御柳夫詩人之咏御柳不過禁御中柳耳此則別
是一種而強名之者也

槐

總論

春秋說題辭槐木者虛星之精

周禮燧人秋

取槐檀之火

淮南子槐之生也入季春五日而兔目

十日而鼠耳更旬而始規二旬而葉成

埤雅弱槐初

生不能自立即於槐下種麻脅槐令長既植移而蒔之

亭亭若一

淮南子老槐生火

天玄主物簿槐木生

丹不復凋殘也木身潤滑常有香氣

本草槐生河南

可作神燭

周禮三槐三公位焉注槐懷也言懷來人

也 春秋元命苞樹槐聽訟其下注槐之言歸也情見
歸實也 淮南子槐市學也樹以青槐 中朝事迹朝
街兩畔植槐號爲槐街 古今注漢顧成廟槐樹悉設
扶老鉤欄 事物紺珠漢元帝末兗州刺史禁民私立
社山陽橐茅鄉社有大槐樹吏伐斷之其夜樹復自立
其故處 摯虞連理槐頌東宮正德之內承華之外槐
樹二株連理而生二榦一心以蓄本根 李公佐南柯
記淳于棼居廣陵郡所居宅南有大古槐一株貞元七

年夢槐安國王來邀爲駙馬領南柯郡既覺尋槐下
穴有蟻數斛中有大蟻處之是其王矣即槐安國都也
又窮一穴直上南枝亦有羣蟻即生所領南柯郡也

清異錄崔鳳蹉跎失志洛南天親觀頗幽雅常陪友生
夏月招涼於古槐下戲曰予不登九品此槐不得爲手
版想亦助不平也是後朋從呼槐爲不平生 清異錄

懿宗時求老槐於城北筆頭谷李殊莊亦不下百年矣
樹腰刻小字一曰錦心氏一曰繡腹郎云殊之祖愛甚

故刻記之 南部新書都堂南門道東有古槐垂陰至
廣或夜聞絲竹之音則省中有入相者俗謂音聲樹

彙苑詳註宋邇英閣雙槐如龍風動槐龍舞 酉陽雜

俎西夏無槐惟夏州有一株或要槐葉移牒取 羣芳

譜槐四五月開黃花未開時狀如米粒採取曝乾炒過
煎水染黃甚鮮其青槐花無色不堪用七八月結實作
莢如連珠中有黑子以子多者爲好 抱朴子槐子服
之補腦令人髮不白而長生 顏氏家訓梁庾肩吾常

服槐實年九十餘目看細字髭髮皆黑 盧氏雜誌唐
裴晉公度在相位日有人寄槐癭一枚欲削爲枕時郎
中庾威世稱博物名請別之庾捧玩良久白曰此槐癭
是雌樹生者恐不堪用 花木考華州三家店西北道
邊有槐甚大蔥鬱周迴可陰數畝槐有癭形如二豬相
趣奔走其迴顧口耳頭足一如塑者

名類 三輔黃圖甘泉谷北岸有槐樹今謂玉樹根榦
盤峙三二百年木也楊震闕輔古語云耆老相傳咸以

謂此樹即揚雄甘泉賦所謂玉樹青葱也 國史纂異
雲陽縣界多漢離宮故地有樹似槐而葉細土人謂之
玉樹 爾雅櫟槐大葉而黑注槐樹葉大色黑者名爲
櫟 爾雅守宮槐葉晝聶宵炕注槐葉晝日聶合而夜
炕布者名爲守宮槐 廣志葉細而青綠者謂之槐江
東有樹與此相反俗名合昏槐 羣芳譜守宮槐一名
紫槐似槐榦弱花紫晝合夜開又白槐似枹而葉差小
槐有極高大者材實重可作器物有青黃白黑數色黑

者爲豬屎槐材不堪用 曲洧舊聞大隈山即莊子所謂具茨山也山有具茨寺其中產一種木身幹枝葉皆如槐三二月開花色紅而細俗呼爲槐三香亦有種園圃中者

棟

淮南子七月其樹棟棟實鳳凰所食也 爾雅翼棟木高丈餘葉密如槐而尖三四月開花紅紫色子可浣衣故名棟子生青熟黃實如小鈴名金鈴子 彙苑詳註

棟花開芬香滿庭其實可以練故名 爾雅翼鳳皇獬廌皆食棟而蛟龍特畏之其材宜板桔槔中尤宜 雲間郡志管子五位之土種棟又鳳凰非棟實不食二十四番花信風至棟花而終其材輕且堅可爲犂轅及牛牽

柏

羣芳譜烏柏一名鴉柏樹高數仞葉似小杏葉而微薄淡綠色五月開細花色黃白實如雞頭初青熟黑分三

辦八九月熟種之佳者有二曰葡萄柏穗聚子大而穰厚曰鷹爪柏穗散而殼薄採杷子在中冬以熟爲候榨取白油以製燭

詳見油類

玄中記荊州有樹名烏臼其實

如胡麻子擣其汁可爲脂其味亦如豬脂

椿

莊子上古有大椿者以八千歲爲春以八千歲爲秋羣芳譜椿一作櫨一作杔一作檣今俗名香椿長而有壽南北皆有之木身大而實其榦端直紋理細膩肌色

赤皮有縱紋易起葉自發芽及嫩時皆香甜生熟鹽醃
皆可茹世皆尚之 五雜俎燕齊人採椿芽食之以當
蔬亦有點茶者其物茁時甚珍之既老則蘖而蓄之南
人有食而吐者然椿有香臭二種臭者土人以湯淪而
瀉之亦可食也考之圖經疎而臭者乃樗耳蓋二木甚
相類但以氣味別之今人不復識認槩呼爲椿也

樗

莊子吾有大樹人謂之樗其本擁腫不中繩墨小枝拳

曲不中規矩 羣芳譜樗亦椿類氣臭俗名臭椿一名
虎目樹一名大眼桐皮粗肌虛而白其葉臭惡 陸璣
詩疏樗樹及皮皆似漆青色其葉臭 本草椿木樗木
舊不載所出州土今處處有之二木形幹大抵相類椿
木實而葉香可噉樗木疎而氣臭膳夫熬去其氣葉亦
可噉北人呼樗爲山椿江東人呼爲虎目葉脫處有痕
如樗蒲子又如眼目故得此名夏中生莢樗之有花者
無莢有莢者無花莢常生臭樗上未見椿上有莢者然

世俗不辨椿樗之異故俗名爲椿莢其實樗莢耳其無
花不實木大端直爲椿有花而莢木小幹多迂矮者爲
樗 五行志漢成帝永始元年河南街郵樗樹生枝如
人頭眉目鬚皆具但無髮耳 集異志後漢靈帝熹平
三年右校別作中有兩樗樹皆高四尺其一株宿夕暴
長長丈餘大一圍作胡人狀頭目髻鬚髮備具 河洛
記洛陽北山謂之卬山其上無大樹都城之北嶺上有
古樗樹不知其來早晚婆婆周迴四五畝在伊闕正南

相當越公等將建都城之日據此樹以爲南北定准嫌
樗木名惡號曰婆婆羅樹

櫟

周祈名義考爾雅櫟其實栳孫炎曰櫟實橡也有栳橐
自裏木雖堅而不堪充材今櫟炭木是 陸璣詩疏苞

櫟秦人謂柞爲櫟河內人謂木蓼爲櫟椒櫟之屬也其
子房生爲栳木蓼子亦房生又栩今柞櫟也徐州謂櫟
爲杼其子爲阜或言阜斗其殼爲汁可以染阜今京洛

及河內多言杼斗或云椽斗謂櫟爲杼五方通語也
本草櫟有二種一種不結實者其名曰械其木心赤一
種結實者其名曰栲其實爲椽 六書故櫟冬不凋其
實亦斗有黑心櫟白櫟綿櫟白櫟子尤細綿櫟以堅忍
得名 郡國志五雲溪歐冶子鑄劍處下有孤潭深而
青有孤石聳出潭上有大櫟樹客兒與弟惠連作詩連
句刻於樹上

楓

山海經黃帝殺蚩尤於黎山棄其械化爲楓樹 爾雅

楓楸楸注楓樹似白楊葉圓而岐有脂而香今之楓香

是 說文楓木厚葉弱枝善搖一名楸楸 三輔黃圖

漢宮殿中多植楓故曰楓宸至霜後葉丹可愛騷人多

稱詠之 格物總論楓樹枝幹修聳葉分三角至秋杪

其葉皆赤簇簇如錦爛然可觀在在有之 拾遺記頻

斯國有大楓樹成林高六七十里善算者以里計之雷

電常出樹之半其枝交蔭於上蔽不見日月之光其下

平淨掃灑雨霧不能入焉 述異記南中有楓子鬼楓木
之老者爲人形亦呼爲靈楓蓋癭瘤也至今越巫有得
之者以彫刻鬼神可致靈異 南方草木狀五嶺之間
多楓木歲久則生癭癭一夕遇暴雨驟雨其樹贅暗長
三五尺謂之楓人越巫取之作術有通神之驗取之不
以法則能化去 朝野僉載江東江西山中多有楓木
人於楓樹下生似人形長三四尺夜雷雨即長與樹齊
見人即縮依舊曾有人合笠於地明日看笠子挂在樹

頭上旱時欲雨以竹束其頭禊之即雨人取以爲式盤
極神驗楓天棗地是也 宋齊丘化書老楓化爲羽人

一統志安福縣有楓木狀如神人面目歲旱以泥封
之則雨 南方草木狀楓香樹子大如鴨卵二月花發
乃連著實八九月熟曝乾可燒惟九真郡有之 爾雅

翼楓脂一名白膠香 金樓子楓脂入地千歲爲琥珀

杉 粘 櫟 同

南方草木狀杉一名被粘 爾雅被粘注粘似松生江

南可以爲船及棺材作柱埋之不腐 格物論杉樹大

者數圍高十餘丈紋理條直皮粗厚葉尖附枝生若針
刺然青青不彫種時宜在山窠深處南方人造屋爲船
多用之出於東海中倭國者尤佳名曰倭木 格古要

論杉木出四川廣西江西湖廣徽州等處俗呼曰參木
又曰檜木色白而其紋理黃稍紅有香甚清或云南蕃
腦子香生此木中有花紋細者如雉雞斑甚難得花紋
粗者亦可愛直理不花者多 溪蠻叢笑野雞斑枋板

皆杉也木身爲枋枝稍爲板又分等則曰出等甲頭曰長行曰刀斧皆枋也曰水路曰笏削曰中扛皆板也

地志七星杉在麻姑山殿後嶺上圍二三丈高切雲漢橫列七株故以星名 遊名山志華子崗上紫杉千仞

被在崖側 李時珍本草槲有赤白二種赤杉實而多

油白杉虛而乾燥 事物紺珠赤油杉色赤而堅有油又名紫櫟赤水樹 鄧元錫函史出紫油者曰油杉

演繁露爾雅毛詩傳皆云樅木則松葉栢身枯木則栢

葉松身按栢葉松身乃今俗呼爲絲杉者也 西京雜

記太液池西有一池名孤樹池中有洲洲上貼樹一株
六十餘圍望之童童如蓋故取爲名 劉欣期交州記

合浦東百里有一杉樹漢安帝永初五年春葉落隨風
飄入洛陽城其葉大常杉數十倍術士盛廉曰合浦東
杉葉也此休徵當出王者帝遣千人伐樹役夫多死者
華夷花木考被小而美者出於縣古稱被出玉山世
以爲上饒而漢志歛有玉山未知孰是其木爲什器几

案則明潔而宜漆爾雅曰槠被按二物葉甚相類但槠聳而被垂被又有佳實此爲不同耳

檀

陸璣詩疏檀木皮正青滑澤與繫迷相似又似駁馬駁馬梓榆其樹皮青白駁犖遙視似馬故謂之駁馬故里語曰斫檀不諦得繫迷繫迷尚可得駁馬 羣芳譜檀善木也有黃白二種江淮河朔山中皆有葉如槐皮青而澤肌細而膩體重而堅狀與梓榆莢莢相似 格古

要論紫檀木出交趾廣西湖廣性堅新者色紅舊者色紫有蟹爪紋新者以水濕浸之色能染物作冠子最妙近以真者楷粉壁上果紫餘木不然黃檀木最香今人多以作帶 唐書單單在振州東南木多白檀 遁甲

開山圖河東有獨頭山多青檀可以爲良弓 廣雅青

檀似奚榼語曰齊人斫檀奚榼先殫

奚榼一作挈榼

漢書注

挽檀檀別名 便民圖纂一僧舍有大樹不知其名春

時如枯夏月方萌每歲待黃梅過方始舒葉葉既開則

水定極準一境農人憑以卜水候後一山丁過見之云
此望水檀也

檜

格物總論檜皮光葉尖硬如芒刺檜柏相半者名檜柏
皆能結子柯葉青青四時不彫也 羣芳譜曲阜孔廟
殿前檜一株相傳宣聖手植紋皆左紐上聳無枝而不
死每遇一代興或聖君出則發一枝 五雜俎孔廟中
檜歷周秦漢晉幾千年至懷帝永嘉三年而枯枯三百

有九年子孫守之不敢動至隋恭帝義寧元年復生生
五十一年至唐高宗乾封二年再枯枯三百七十四年
至宋仁宗康定元年復榮至金宣宗貞祐二年兵火摧
折無復了遺後八十二年爲元世祖三十一年故根復
發於東廡頽址之間遂日茂盛翠色葱然至太祖洪武
二年己巳凡九十六年其高三丈有奇圍四尺許至弘
治己未爲火所焚今雖無枝葉而直榦挺然不朽不摧
生意隱隱未嘗枯也 太清記太清宮檜老子手植根

株枝幹皆左紐 遊名山記節山玉晨觀門列古檜十
四傳爲許長史手植大逾合抱紋皆左紐若出人力此
可以觀造化之巧近一株瘁仆人割其皮以去道士云
左紐檜不止是三清殿前凡六老君殿前凡二藏殿茅
君殿後皆有其一 太平清話虞山至道觀有所謂七
星檜者相傳爲梁時物也今僅存其三餘則後人補植
者而三株中又有雷震風擘者尤爲詭異真竒觀也
平泉花木記雁翅檜葉婆婆似雁翅也 老學庵筆記

海檜天矯堅瘦皆天成又有刻削盤屈而成者名土檜
陳郁話腴真廟朝寢殿側有古檜秀茂不羣名御愛
檜然橫礙殿簷真皇意欲去之一夕風雷轉摺其枝時
以爲瑞 花木考宣和後四年萬歲峯改名壽岳旁有
兩檜一夭矯者名曰朝日升龍之檜一偃蹇者名曰臥
雲伏龍之檜皆玉牌填金字書之 海錄碎事平江學

中有龍頭檜蘸水檜 山堂肆考常州列帝廟有獨孤
檜潁州靈壇觀有再生檜 老學庵筆記亳州太清宮

檜花開時蜂飛集其間作蜜極香謂之檜花蜜

荆

春秋運斗樞玉衡星散爲荆 格物總論荆小木叢生

枝莖婆婆葉刻缺粗澁荒坂洲渚間多有之又有所謂
牡荆山荆杜荆等名不一而足 藝文類聚禮弓矢圖

楚燬以荆爲之然以灼正以荆者凡木心圓荆心方也
廣志楚荆也牡荆蔓荆也赤莖大實者名曰牡荆

漢郊祀志以牡荆畫幡如淳注牡荆荆之無子者 本

草牡荊一名黃荊一名小荊 南方草木狀寧浦有三
種荊金荊可作枕紫荊堪作牀白荊堪作履與他處牡
荊蔓荊全異又彼境有牡荊取節不相當者日暈時刻
之與病人身齊等置牀下雖危困亦愈 登真隱訣注
梁天監三年上將合神仙飯奉勅論牡荊曰荊花白多
子子粗大歷歷踈生不過三兩莖多不能圓或褊或異
或多似竹節葉與餘荊不殊蜂多採牡荊牡荊汁冷而
甜餘荊被燒則烟火氣若牡荊體慢汁實烟火不入其

中主治心風第一於時遠近尋覓不得猶用荊葉今之
所有者云 大業拾遺錄北景郡在林邑南有金荊生
於高山峻阜大者十圍盤屈瘤蹙文如美錦色艷於真
金中夏時有於海際得之工人數用甚精妙貴於沉檀
朝野僉載煬帝令朱寬征畱仇國還得金荊瘤數十
片木色如真金密緻而文彩盤蹙有如美錦甚香極細
可以爲枕及案面 事物紺珠藥荊莖葉似石楠六月
開花紫白色葉有細黑點冬不凋 孝子傳古有兄弟

忽欲分異出門見三荆同株接葉連陰歎曰木猶欣聚
况我而殊哉還爲雍和

椒

運斗樞玉衡星散爲椒 詩疏椒樹似茱萸有針刺莖
葉堅而滑澤蜀人作茶吳人作茗皆合煮其葉以爲香
今成臯諸山間有椒謂之竹葉椒其樹亦如蜀椒少毒
熱不中合藥也可著飲食中又用蒸雞豚最佳東海諸
島上亦有椒樹枝葉皆相似子長而不圓甚香其味似

橘皮島上麋鹿食此椒葉其肉自然作椒橘香 埤雅

椒似茱萸而小赤色內含黑子如點今謂椒目 酉陽

雜俎椒可以求水銀 燉煌新錄虜蘇割刺在荅魯之

右大澤中高百尋然無草木石皆赭色山產椒椒大如

彈丸然之香徹數十里每然椒則有鳥自雲際翩躚五

色名赭爾鳥蓋鳳凰種也昔漢武帝遣將軍趙破奴逐

匈奴得其椒不能解以問東方朔朔曰此天仙椒也塞

外千里有之能致鳳武帝植之太液池至元帝時椒生

果有異鳥翔集

清異錄椒又名扁鵲銘蜀產者上葉

屬木故青皮本火故赤花應土故黃膜垂金故白子符

水故黑五行全足草中大丹服餌家重之 通志椒曰

陸機曰南椒生漢中者曰漢椒蜀中者曰蜀椒巴中曰

巴椒 山海經琴鼓之山其木多椒景山多秦椒 范

子計然蜀椒出武都赤色者善秦椒出天水隴西細者

善 本草蜀椒味辛溫逐骨節皮膚死肌堅齒髮調關

節耐寒暑久服頭不白輕身增年一名巴椒一名唐穀

一名胡辛一名含丸使者樹如茱萸有刺秦椒久服輕
身好顏色耐老增年 事物紺珠漢椒似胡椒而大黑
色竹葉椒如川椒而毒熱 本草蔓椒味苦溫無毒一
名豕椒一名豬椒一名斑椒一名狗椒 酉陽雜俎胡
椒出摩伽陀國呼爲昧履支其苗蔓生莖極柔弱葉長
寸半有細條與葉齊條上結子兩兩相對其葉晨開暮
合合則裹其子於葉中子形似漢椒至芳辣六月採今
作胡盤肉食皆用之 真臘風土記胡椒纏藤而生累

纍若綠草子其生而青者尤辣

本草胡椒大溫無毒

味甚辛辣殺一切魚鱉草毒

榕

南方草木狀榕樹南海桂林多植之葉如木麻實如冬青樹幹拳曲是不可以爲器也其本稜理而深是不可以爲材也燒之無燭是不可以爲薪也以其不材故能久而無傷其陰十畝故人以爲息焉而又枝條既繁葉又茂細軟條如藤垂下漸漸及地藤稍入地便生根節

或一大株有根四五處而橫枝及鄰樹即連理南人以爲常不謂之瑞木 後山談叢蔡州壺公觀有大木世莫能名也高數十尺其枝垂入地有根復出爲木枝復下垂如是三四重圍環列如子孫然世傳漢費長房遇仙者處木即縣壺者沈丘令張戡閩人嘗至蔡爲余言乃榕木也嶺外多有之其四垂旁出無足怪者 彙苑詳註榕或作櫟言材不中梓人用也有二種一種矮而盤桓初生如葛藟緣木後乃成樹其鬚著地復生爲根

一種名赤榕最爲高大此二樹者爲蔭最濃 泉南雜
志衛西榕樹幹大如一間屋枝上有纒纒垂下者謂是
根也其高參天枝葉蔭可三十餘丈相傳韓少卿國華
爲郡誕魏公日樹杪爲吐烟靄榕樹千年者其上生伽
南香 閩部疏榕賤木也至福州始多故以名城然至
漳泉間更多而鉅扶疎旁出根如流蘇下垂著幹即抱
負爲一輪囷連拳好作怪狀其根盤地峻嶒蚪臥恒畝
許多根故易茂而難拔不才故寡伐而長壽 五雜俎

榕木惟閩廣有之而晉安城中最多故謂之榕城亦曰榕海云其木最易長折枝倒埋之三年之外便可合抱柯葉扶疎上參雲表大者蔽虧百畝老根盤拏如石焉木理邪而不堅易於朽腐十圍以上其中多空此莊子所謂以不才終天年者也閩人方言亦謂之松按松字古作㮮則亦與榕通用矣

楮

漢郊祀志稷穀樹師古注穀樹楮樹也其子類穀故曰


稷種 詩疏穀幽州人謂之穀桑或曰楮桑荆揚交廣
謂之穀中州人謂之楮殷中宗時桑穀共生是也今江
南人績其皮以爲布又擣以爲紙謂之穀皮紙長數丈
潔白光輝其裏甚好其葉初生可以爲茹 廣州記蠻
夷取穀皮熟槌以擬氈汁能寫金 物類相感志楮膠
可以團丹砂 格物總論楮樹高丈餘大者數圍枝條
修聳葉刻缺而澁有毛取其實可以練絹又爲面藥以
米泔灑楮亦能生菌也 埤雅皮斑者是楮皮白者是

穀有瓣者曰楮無瓣者曰構 本草圖經楮有二一種
皮有斑花文謂之斑穀今人用爲冠一種皮無斑葉似
葡萄作瓣而有子者其實初夏生如彈丸青綠色六七
月漸深紅色乃熟 抱朴子楮實赤者餌之一年老還
少 羣芳譜斑穀三月開花成長穗如柳花狀不結實
又一種皮白無花葉有極叉似葡萄葉開碎花結實如
楊梅用時但取葉有極叉有子者爲佳八九月采實名
楮桃一名穀實

樺

上林賦華楓枰櫨師古注華即今之皮貼弓者也 大業拾遺二年汾州起汾陽宮宮南外平林率是大樺木高百餘尺行從文武皆剝取皮覆菴舍 格物總論樺木似山桃皮上有紫黑花勻者用以裹鞍及弓韁又可入藥用字亦作檣 格古要論韉韉樺皮木出北地色黃其斑如米大微紅色能收肥膩甚難得裹刀靶爲最今人以樺皮飾弓名樺皮弓又以襯靴 本草樺堪

爲燭取脂燒辟鬼 五雜組樺木皮軟而中空若敗絮
焉故取以貼弓便於握也又可以代燭余在青州持官
炬者皆以鐵籠盛樺皮燒之易燃而無烟也 博物要
覽樺皮畫家用以燒烟熏紙作僞古畫故亦名檣



格致鏡原卷六十五

欽定四庫全書

子部

格致鏡原卷六十六

詳校官中書_臣羅錦森

侍讀_臣孫球覆勘

總校官中書_臣朱鈐

校對官原任典簿_臣郭祚熾

謄錄監生_臣葉世華

欽定四庫全書

格致鏡原卷六十六

大學士陳元龍撰

木類

三

女貞

格物總論冬青一名女貞木一名萬年枝樹身大合抱
皮粗葉茂盛經冬不凋能結子每枝一簇而皮青黑色
有瓢中心核飛禽食之 典術女貞木者少陰之精冬
葉不落 本草女貞木名亦作楨蘇頌曰女貞負霜蔥

翠故貞女慕其名一名冬青

晉宮閣名華林園有萬

年樹十四枝

方勺泊宅編徽宗興畫學問試諸生以

萬年枝上太平雀爲題在試無能識其何木遂皆黜不
取或密以叩中貴中貴曰萬年枝冬青木也太平雀頻
伽鳥也羣芳譜人因女貞冬茂亦呼爲冬青不知女

貞葉長子黑冬青葉圓子紅枸骨與女貞亦相似女貞
即俗呼蠟樹者冬青即俗呼凍青樹者枸骨即俗呼猫
兒刺者蓋三樹也女貞一名貞木一名蠟樹以子種而

生最易長樹似冬青葉厚而柔長面青背淡長者四五寸甚茂盛凌冬不凋人亦呼爲冬青五月開細花青白色花甚繁九月實成似牛李子纍纍滿樹生青熟紫木肌白膩立夏前後取蠟蟲種裹置枝上半月其蟲化出延緣枝上造成白蠟民間大獲其利 宋氏樹畜部水冬青葉細利於養蠟子

阜角

羣芳譜阜角一名阜莢一名烏犀一名懸刀所在有之

樹高大葉如槐葉瘦長而尖枝間多刺夏開細黃花結實有三種一種小如豬牙一種長而肥厚多脂而粘一種長而瘦薄枯燥不粘以多脂者爲佳 急就篇注阜

英樹一名雞棲 稽神錄泉州文宣王廟庭宇嚴峻學

校之盛冠於藩府庭中有阜英樹每州人將登第則生

一英以爲常 墨客揮犀唐七聖殿有阜英一株合數

人抱相傳明皇洎貴妃共植於此每歲結實必有十數

英合歡者 神仙傳葛仙翁斬阜英樹爲杯用以盛酒

酒味益妙 南史齊蕭鸞嘗用阜英訖授餘瀝與左右
曰此猶堪明日用 七修類藁鹽酒蟹每一器十隻用
阜英半挺置中則經歲不壞 酉陽雜俎鬼阜英生江
南地澤如阜英高一二尺沐之長髮葉亦去衣垢波斯
皂莢出波斯國呼爲忽野簷默拂林呼爲阿梨去伐樹
長三四丈圍五六尺葉似枸櫞而短小經寒不凋不花
而實其莢長二尺中有隔隔內各有一子大如指赤色
至堅硬中黑如墨甜如飴可噉亦宜藥用

櫟

廣志櫟一名并閭葉似車輪乃在顛下有皮纏之附地起二旬一採轉復上生 格物總論櫟櫟一名栢櫟高二二丈無枝榦葉長而大岐生枝頭皮相重裹一行一皮各有節皮可爲索也 丹鉛總錄櫟櫟一名鬣葵又曰蒲葵 羣芳譜棕櫟俗作棕鬣皮中毛縷如馬之鬣鬣故名出嶺南西川今江南亦有種之最難長初生葉如白芨葉長高二三尺則木端數葉大如扇上聳四散

歧裂大者高一二丈葉有大如車輪者其莖三稜稜邊如刺四時不凋幹正直無枝近葉莖處有皮裹之每長一層即爲一節幹身赤黑皆筋絡可爲鐘杵亦可旋爲器物其皮有絲毛錯綜如織剝取縷解可織衣帽褥椅鍾盂之屬大爲時利每歲必兩三剝之否則樹死或不長剝之多亦傷樹三月於木端莖中出數黃苞苞中有細子成列乃花之孕也狀如魚腹孕子謂之櫻魚亦曰櫻筍漸長出苞則成花穗黃白色結實纍纍大如豆生

黃熟黑甚堅實木有二種一種有皮絲可作繩一種小
而無絲惟葉可作帚以爲王簣者非 高士傳方鏐隱
天門山以椶櫚葉拂書號曰無塵子 羣芳譜椶皮作
繩入水千年不爛昔有人開塚得一索已生根 坡詩
注椶筍狀如魚子味如苦筍而加甘芳蜀人以饌佛僧
甚貴之而南方不知也筍生膚毳中益花之方孕者正
二月間可剝而取過此苦澁不可食矣取之無害於木
而宜於飲食法當蒸熟所施客與竹筍同蜜煮醋浸可

致千里外 埤雅廣要蜀錦城之南有海棕焉幹猶龍
鱗枝猶鳳尾高百餘尺相傳繇李唐來閱千稔 益部
方物畧記海欒大抵欒類然不皮而幹葉叢於杪至秋
乃實

桄榔

本草桄榔一名姑榔一名麴木一名董欒一名鐵木
蜀志興古南漢縣有桄榔樹有麴大者至百斛 廣志
桄榔樹大四五圍長五六丈洪直無枝條其顛生葉不

過數十似枘櫚其子作穗生木端其皮可作綆得水則
柔韌胡人以此聯木爲舟皮中有屑如麵赤黃色多者
至數斛蜜製可食與常麵無異 嶺表錄異枕榔木枝
葉竝茂葉下有鬚如麤馬尾廣人采之以織巾子其鬚
尤宜鹽水浸漬即麤脹而韌以此縛舶不用釘線木性
如竹紫黑色有文理工人以制博奕局又其木剛作艾
鋤利如鐵中石更利惟中蕉柳致敗耳 北戶錄枕榔

莖葉與波斯棗古散

古散堪爲拄杖

椰子檳榔小異其木如莎

樹皮釀木皮出麪可食洛陽伽藍記云昭儀寺有酒樹
麪木得非桃榔乎其心爲炙滋腴極美 海槎餘錄桃
榔木類紵櫟樹樹杪挺出數枝每枝必贅青珠數條每
條不下百餘顆計一樹可得青珠百餘條團團懸掛若
傘蓋可愛也其木最重番舶用爲鎗以代鐵其鋒鋌倖
於鐵也色類花梨而多綜紋

花櫚

本草櫚木出安南性堅紫紅色有花文者謂之花櫚可

作牀几扇骨爲枕令人頭痛性熱故也 格古要論花

梨木出南番廣東色與降真香相似亦有香其花有鬼
面者可愛花麤而色淡者低廣人多以作茶酒盞 羣
芳譜櫚木色似紫檀有花紋者謂之花櫚俗作花梨者
非 博物要覽花梨樹葉如梨而無花實肌理細膩可
作器具亦有花紋成山水人物花鳥形者名花梨影木

鐵力

格古要論鐵力木出廣東色紫黑性堅硬而沉重東莞

人多以作屋 手鏡蠻地多山產美材鐵栗木居多有
力者任意取之故人家治屋咸以鐵栗等良材爲之方
堅且久若用雜木多生蛀蟲大如吳蠶日夜啣梁柱中
礫礫有聲不五年間皆空中遂至傾倒其鐵栗有參天
徑丈餘者廣州人多來採製椅桌食隔等器鬻於吳浙
間可得善價

諸木

淮南王木譜模木生周公塚上其葉春青夏赤秋白冬

黑以色得其正也楷木生孔子塚上其餘枝疎而不屈以質得其直也 花木考楷木出曲阜孔林紋如貫錢有直性無橫性製爲杖可以戒暴 王世懋東遊記子貢楷大倍他植枯而不蝕真古木也 五雜組曲阜孔林有楷木相傳子貢手植者其樹十餘圍今已枯死其遺種延生甚蕃其芽香苦可烹以代茗亦可乾而茹之其木可爲笏枕及棋枰云敲之聲甚響而不裂故宜棋也枕之無惡夢故宜枕也此木聖賢之遺跡而守土之

官日逐採伐制器以充饋遺今其所存寥寥反不及商
丘之木以不材終天年不亦可恨之甚哉 酉陽雜俎
蜀中有木類柞衆木榮時如枯枿隆冬方萌芽布陰蜀
人呼爲楷木 詩疏園有棘棘酸棗也 爾雅楷山樗
注楷似樗色小白生山中因名云亦類漆樹 詩疏楷
葉似欒木皮厚數寸可爲車輻或謂之楷欒許慎正以
楷讀爲稭今人言楷失其聲耳 爾雅杻攄注似棣細
葉葉新生可飼牛材中車輞關西呼杻子一名土樗

詩疏杻櫪也葉似杏而尖白色皮正赤爲木多曲少直
枝葉茂好華如棟而細莖正白蓋此樹今官園種之正
名曰萬歲既取名於億萬其葉又好故種之或謂之牛
筋或謂之櫪材可爲弓弩幹也 埤雅釋木云櫪羅櫪

一名羅其文細密如羅故曰羅也又有白者赤羅文棘
白羅文緩雖皆所謂文木然而赤羅爲上棟謂之綾杉
謂之紗櫪謂之羅羅亦有華者俗謂之羅錦羅錦猶言
杉錦棟綾也羅錦明杉錦暗今虜人有棟綾器其文如

綾綺狀又下於杉錦矣 詩疏枸樹山木其狀如櫨一
名枸骨高大如白楊所在山中皆有理白可爲函板枝
柯不直子著枝端大如指長數寸噉之甘美如飴八九
月熟江南特美今官園種之謂之木蜜古語云枳枸來
巢言其味甘故飛鳥慕而巢之本從南方來能令酒味
薄若以爲屋柱則一屋之酒皆薄 物類相感志枸樹
江南謂之白石樹詩所謂南山有枸是也 廣志木蜜
樹號千歲根甚大伐之四五歲乃斷取不腐者爲香生

南方蜜可食 詩疏楷其形似荆而赤莖似著上黨人
織以爲斗筲箱器又揉以爲釵故上黨人調問婦人欲
買楮否曰竈下自有黃土問買釵否曰山中自有楷

唐書萬歲登封元年春封嵩山御朝覲壇受朝賀登封
壇南有榭樹大赦日於其杪置金雞改名爲金雞樹

羣芳譜漆一名叅似榎而大樹高二三丈餘身如柿皮
白葉似椿花似槐子似牛李子木心黃生漢中山谷梁
益陝襄欽州皆有金州者最善廣州性急易燥 格物

論漆樹汁可以髹物以竹筒釘入木中取之人多種於山谷間 花木考百濟西南海中有三島出黃漆樹似小榎樹而大六月取汁漆器物若黃金其光奪目 南方草木狀棹樹幹葉俱似椿以其葉煮汁漬果呼爲棹汁若以棹汁雜彘肉食者即時爲雷震死出高涼郡

紺珠棹汁唯可染絳 花木考郴州之木櫛爲貴其爲樹四時無改柯易葉質性堅於檜柏伐而材之雖百歲雨淋日炙弗蠹弗腐作屋置以當風雨之衝棺在土與

石櫟敵此櫛之所以爲貴也櫛樹歲結子其子小者小於榛味如之大者大如榛而味苦土人取爲果實謂小實者爲圓珠櫛大者苦珠櫛以此分二種其材固無異也按山海經前山其木多羣音諸注謂其樹作子可食冬

夏恒青作柱難腐羣豈即此櫛耶羣芳譜楂橡栗之

屬生閩廣江右山谷間樹易成材亦堅韌實如橡斗無刺子或一二或三四似栗而殼薄仁皮色如榧肉如栗味苦多膏油杜工部詩石櫟徧天下水陸兼浮沉注

楸木名石楸子如芎藭其皮可以禦饑時天下荒亂小民轉溝壑水陸並載石楸以充糧 蜀記紗木樹高十

餘丈濶四五圍樹顛生葉兩邊行列如飛鳥翼皮中有

白麪石許磨屑可作飯呼爲紗麪輕滑勝枕榔麪 吳

錄交趾有櫟木其皮中有如白米屑者乾之水淋之似

麪可作餅

楊慎云櫟即枕榔張爾公云櫟即紗木非枕榔也

山海經橐山多

楠木郭注今蜀中楠木七八月中吐穗穗成如鹽粉

廣志柯木生廣南山谷可爲船舫一名木桴 南越志

威寧縣有穿州其上多綸木似穀皮可以爲綿 嶺表
錄異抱木葉細如檜身堅類柏唯根軟不勝刀鋸今潮
循人多用其根剝而爲履當木濕時刻削易如割爪木
乾之後柔刀不可理也或油畫或漆其輕如通草暑月
著之隔卑濕地氣力如杉木今廣州諸郡牧守初到任
皆有油畫抱木履也 酉陽雜俎武陵郡北有鹿木二
株馬伏波所種木多節 九域志金城山上有韓木乃
文公所植不知其名士人觀其花之疎密以知登第之

多寡 王會篇卜人以丹砂夷用闌木注木生水中黑色而光堅若錢 古今注豎木出交州色黑有文亦謂之烏文本 博物要覽烏木出海南南蕃雲南葉似棕櫚性堅老者純黑色且脆間道者嫩今僞者多是繫音記木染成作筋 格古要論娑木出廣西四川色黃紋理稍黑花紋細者可愛直理者多性最柔可圈束新者有香甚濁 事物紺珠蘇木出海南樹似菴蘿葉似榆抽條長丈餘花黃子初青熟黑木赤可染絳 博物要覽

蘇木樹類槐出九真煎汁忌鐵器則色黯其木蠹之糞
名曰紫納亦可染絳 容齋隨筆杭木今饒州處處有
之莖幹不純是木小人爭鬪者取葉按擦皮膚輒赤腫
如被傷以誣人至和鹽擦卵則又染其外若赭色也
物類相感志杭木出豫章煎其皮甚赤用以藏卵使不
壞爾雅謂杭魚毒是也 硯北雜志峽川黃牛廟後鬱
木似冬青落葉似符篆不同 格古要論櫟木出湖廣
及江西南安萬羊山木色白紋理黃花紋麤亦可愛謂

之倭櫛不花者多有一等稍堅理直而細謂之草櫛俗
呼曰椶木 事物紺珠櫛木似椿莖間有刺子辛如椒
南人淹藏爲果 花木考強木造船其上多飾珠玉以
爲遊戲強木不沉木也方一寸以百斤巨石縋之終不
沒 名義考世傳木蘭舟不知木蘭是何物陶隱居云
似欄木皮甚薄而味辛香相如傳注如椒而香可作面
膏或云與桂同或云桂中之一種玉篇櫛木蘭也 穆
天子傳天子釣於河以觀姑繇之木注姑繇大木也

汲冢周書白州比閭其華若羽伐其木爲車終行不敗
南州異物志木有摩厨生于斯調國其汁肥潤其澤
如脂膏馨香馥郁可以煎熬食物香美如中國所用油

三輔黃圖漢有杙詣宮杙

音意

詣木名

宜都山川記

恨山有異木人無見其朽者其名千歲葉似棗色似桑
冬夏青貞強少節目 蜀都賦注交讓木名兩樹對生
一樹枯則一樹生如是歲更終不俱生俱枯也出岷山
在安都縣 拾遺記晉人爲介之推起思烟臺種仁壽

木木似栢而枝長柔軟其花堪食呂覽云木之美者有
仁壽之華 孔光傳賜太師靈壽杖云靈壽木名似竹
有節長不過八九尺圍三四寸自然有合杖制不須削
治也 詩疏楮櫝節中腫以扶老今靈壽是也今人以
爲馬鞭及杖弘農共北山甚有之 酉陽雜俎無患木
燒之極香辟惡氣一名噤婁一名桓昔有神巫曰瑤肥
能符効百鬼擒魑魅以無患木擊殺之世人競取此木
爲器用却鬼因曰無患木 纂異文無患木名也實可

以去垢核黑如堅櫨無患木子僧家貫之爲念珠惟取
紫紅色小者佳 博物要覽櫨子木生山中樹甚高大
枝葉皆如椿其葉對生五六月開白花結實如彈丸生
青熟黃老則文皺黃時肥如油煤之形味辛氣膈且硬
其蒂下有二小子相粘承之實中一核堅黑如珠其子
可作素珠碾碎可洗真珠 酉陽雜俎通脫木如婢麻
生山側花上粉主治惡瘡心空中有瓢輕白可愛女工
取以飾物 寰宇記嶺南容州有勾芒木可以爲布里

人所之新條更生取之績以爲布 格古要論人面木
出鬱林州春花夏實秋熟兩邊似人面故以名之 事
物紺珠接骨木高一二丈花葉似片木輕虛無心斫枝
插土便生一名木葫蘆 彙苑枳柜即圖經所謂接骨
木也 事物紺珠龍骨木根如梧櫟幹如臂而扁皮青
翠花黃心紅瓣根身有刺斷之有汁可編籬又名火殃
樹烽火木 格古要論虎斑木出海南其紋理似虎斑
故名鵲鵲木出西蕃其木一半紫褐色內有蟹爪紋一

半純黑如烏木有距者價高西蕃作駱駝鼻中紋子不染肥膩嘗見有作刀靶者不見其大者 酉陽雜俎臺

山有色綾木其理如綾紋人取以爲枕呼色綾枕 松

漠記聞棕櫚木多有文縷可愛多用爲椀 羅浮山記

男青條蕊之屬莫不朱色尤易植立折挿土中因便開

榮 彙苑女青亦木名見道藏有女青鬼律 湘烟錄

女青烏葛也見張揖廣雅一名雀翺生朱崖見本草

叙州府志黃葛木其形如衆藤連理合而爲一大者合

抱高數丈葉如橡葉喜緣崖壁生壅腫屈曲不爲材用
韻書云壽可千歲 錦繡萬花谷忠州景德觀前有古
木大數十圍枝柯盤鬱如蓋山中人云此黃葛木千年
物也 格古要論赤水木色赤紋理細性稍堅且脆極
滑淨 事物紺珠臙脂木色如臙脂堅緻可鑲作艾子
木高疎花黃葉小子若萸麻之曰艾油 花木考放杖
木生溫括睦婺山中樹如木天蓼老人浸酒服之一月
放杖故以爲名也 陸游入蜀記石端義者性殘忍每

捕官吏繫獄輒以石鹽木枷枷之石鹽木蓋木之至堅重者每曰木名石鹽天生此爲我用也其後石坐罪竟荷校云 南越志廣州有樹可以禦火山北謂之慎火或謂之戒火多種屋上以防火也但南中無霜雪故成樹 伏琛齊地記東武城東南有勝火木經野火燒炭不滅故東方朔謂爲不灰之木 太平寰宇記不灰木俗多爲鋌子燒之成炭而不灰出膠州葉如蒲草束以爲燎俗呼爲萬年火把 開山圖徐無山出不灰之木

其木色黑似炭而無葉 花木考圖經曰不灰木出上

黨今澤潞山中皆有之蓋石類也其色青白如爛木燒之不然以此得名或云滑石之根也出滑石處皆有亦名無灰木採無時今處州山中出一種松石如松幹而實石也或云松久化爲石人家多取以飾山亭及琢爲枕雖不入藥然與不灰木相類故附之 輟耕錄回紇

野馬川有木曰鎖鎖燒之其火經年不滅且不作灰彼處婦女取根置帽入火不焚如火鼠布云 上林賦鮮

支黃礫師古注鮮支即今支子樹也 花木考富家則

種椰子一千株或二三百株爲產業其椰子有十般取
用嫩者有漿甜可食又可釀酒老者肉打油做糖或做
飯外衣打索造船殼爲椀爲酒鍾又好燒酒灰打廂金
銀細巧生活樹好造屋葉堪蓋屋出柯枝國 格古要

論椰子木出廣西梧州府鬱林州樹似檳榔實大如瓜
堪爲飲器文選曰檳榔無枝椰葉無陰檳榔亦出廣西
鬱林州樹如棕櫚高七八丈其實尖者爲貴與石灰同

食令人齒黑故有雕題黑齒之俗實能辟瘴氣故土人
日日早食客至傳以相待 庶物異名疏魏王花木志
君遷樹細似甘蕉子如馬乳一曰子如瓠形即古度樹
也不花而實子從皮出大如安石榴正赤初時可煮食
司馬溫公名苑云君遷子如馬嬾俗云牛嬾柿是今之
造扇用此 北戶錄蠹母木即南越志所云古度樹一
呼耶子南人號曰柁實從木皮中出如綴珠璫大如櫻
桃黃即可食過則實中化蛾飛出亦有爲蚊子者 國

史補嶺南有蚊樹似枇杷樹皮裂蚊紛然而出 魏王

花木志都桷樹出九真交趾野生三四月開花赤色子

似木瓜八九月熟 薛瑩荆揚異物志桲子樹南越丹

陽諸郡皆有之實如梨冬熟味酢留子樹七八月熟核

堅味與桲子同 事物紺珠棕子樹葉似柿兩葉相當

子圓細如牛李生青熟黑材中車輞 交州記都句樹

似楸櫚木中出屑如麪可啖 大業拾遺南海郡送都

念子樹一百株勅付西苑十六院內種此樹高一丈許

葉如楊枝柯長細花金色花葉正赤似蜀葵而大其子
小於柿子甘酸至美蜜漬爲粽並佳 資暇錄豆有圓
而紅其首烏者舉世呼爲相思子即紅豆之異名也其
木斜斫之則有文可爲彈博局及琵琶槽其樹大株而
白枝葉似槐其花與阜英花無殊其子若蠶豆處於甲
中通身皆紅李善云其實赤如珊瑚是也 格古要論
金剛子木出海南安南六楞遍身花紋深細可愛堅且
實故名金剛子作素珠冬月不冷手大者如榛子小者

如梧桐子亦有如圓眼大者 大理府志念珠樹在城北五十里每穗結實百八枚昔李賢者寓周城主人其家婦產難賢者摘念珠一枚使吞之珠在兒手中擎出棄珠之地叢生珠樹 香譜丁香生東海及崑崙國二月三月花開七月方結實 本草注丁香生廣州樹高丈餘凌冬不凋葉似櫟而花圓細色黃子如丁長四五分紫色中有粗大長寸許者俗呼爲母丁香擊之則順理而折味辛主風毒諸腫能發諸香及止乾霍亂嘔吐驗

酉陽雜俎阿魏出伽闍那國即北天竺也伽闍那呼
爲形虞亦出波斯國波斯呼爲阿虞截樹長八九丈皮
青黃二月生葉葉似鼠耳無花實斷其枝汁出如飴久
乃堅凝拂林國僧鸞所說同摩伽陀國僧提婆言取其
汁和米豆屑合成阿魏 唐本草薰渠即阿魏別名
元飲膳正要阿魏根名穩展性臭能止臭和食料甚香
美 一統志三佛齊出阿魏樹不甚高土人納竹筒於
樹梢脂滿其中冬月破筒取脂即阿魏也或曰其脂最

毒人不敢近每採時繫羊於樹下自遠射之脂著於羊
羊斃即爲阿魏 五雜組俗云黃金無假阿魏無真阿
魏生西域中一名合昔泥其樹有汁沾物即化人多牽
羊豕之類繫樹下遙以物撼其樹汁落則羊豕皆成阿
魏矣樹上之汁終不可得故云無真也 本草雷斅云

阿魏驗法有三第一以半銖置熟銅器中一宿至明沾
阿魏處白如銀汞無赤色第二以一銖置五斗草自然
汁中至明如鮮血色第三以一銖置柚樹上樹立乾即

是真者研細熱酒器上裛過入藥 玄覽枸杞千歲爲
犬子 事物紺珠枸杞枝幹高三五尺葉如榴葉而薄
軟可食 花木考三佛齊產沒藥樹高大如松皮厚二
三寸採時掘樹下爲坎用斧伐其皮脂流於坎旬餘方
取之淳泥產片腦樹如杉檜取之者必齋沐而往其成
片似梅花者爲上其次有金脚速腦米腦蒼腦札聚腦
又一種如油名腦油 花木考片腦產暹羅諸國惟佛
打泥者爲上其樹高者二三丈葉如槐而小皮理類沙

柳腦則其皮間凝液也好生窮谷島夷以鋸付狔就谷中尺斷而出剥而採之有大如指厚如二青錢者香味清烈瑩潔可愛謂之梅花片鬻至中國擅翔價焉復有數種亦堪入藥乃其次耳 五雜組血竭一名麒麟竭出南番中廣州亦有之樹高數丈葉似櫻桃而有三稜脂液滴下如膠飴狀久而堅凝色如乾血又能破積血止金瘡血故以血竭名也一云是紫錫樹之脂驗者以透指甲爲真 事物紺珠杜仲高數丈葉如柘皮如厚

朴折之白絲相連厚朴高三四丈徑一二尺葉如柳不凋紅花青實皮鱗皴而厚紫色 一統志鄂南有淨土樹三月開花如桃花八月結實如小栗殼中皆黃土相傳鳩摩羅什覆屨於土中所生故名淨土 西京雜記上林苑有千年長生樹十株萬年長生樹十株 洛陽宮殿簿明光殿前長生二株含章殿前長生一株 晉宮閣名華林園長生六株萬年殿前長生二株 鄴中記金華殿後有皇后浴室種雙長生樹枝條交於棟上

團團車蓋形冬日不凋葉大如掌至八九月乃生華華
色白子赤大如橡子不中啖也世人謂之西王母長生
樹 太平廣記楚國王仲先聞潘章之美因願爲友遂
同衾枕情踰伉儷未幾偕沒其家憫之合葬於羅浮山
忽生一樹柯條枝葉無不相抱時人號曰共枕樹 晉
宮閣名華林園中有君子樹三株 太平御覽君子樹
似檉松曹爽樹之於庭 事物紺珠慈母樹高丈餘葉
如櫻桃而小 五侯鯖羅漢樹有雌雄雄者開花雌者

結子子細腰似葫蘆 硯北雜志杜子美舊居在秦州

東柯谷今爲寺山下有大木至今呼爲子美樹 李紳

詩序新昌宅書堂前有藥樹一株今已盈拱前長慶中

於翰林院西軒藥樹下移得纔長一寸僕夫封一泥圓

以歸植今則長成名之曰天上樹 潛確類書肉樹端

溪豬肉子也大如杯炙而食之味如豬肉而美麪樹南

中桄榔也酒樹桄也 華夷花木考弓樹在全羅道光

州南門外枝幹輪囷大數十圍高七十餘尺邑人以發

葉早晚占年之豐歉今枯 爾雅樸檉心注樸檉一名
心樸檉斛檉也有心能濕江河間以作柱 五侯鯖白
蕤械樸也燒之其烟與他木異直上如線高五七丈不
絕 南方草木狀文木樹高七八尺色黑如水牛角

彙苑詳註石帆海樹也紫黑色其根株着實其枝柯如
鐵綆相勾聯高一二尺許疑以其扁薄如帆故呼爲石
帆今人取置花盆中以爲玩 事物紺珠紫珠樹似黃
荊葉小無極子紫圓如小珠 玄中記東海有樹名爲

白蒙其汁可爲脂色白味甘 本草拾遺旁其烏藥也
李時珍云烏以色名其葉狀似鱗魮故俗呼爲鱗魮樹
旁其方音訛也陳藏器云樹生似茶高丈餘一葉三桠
葉青陰白狀似山芍藥及烏樟根色黑褐作車轂紋橫
生直根者不堪用 酉陽雜俎昔婁約居常山据禪座
有野嫗手持一樹植之於庭言此是蜻蜒樹歲久芬芳
鬱茂有一鳥身尾長常止息其上 五侯鯖蝴蝶樹高
三五尺葉皺而有稜春暮盛開山谷間有之 爾雅魄

檟榼注魄大木細葉似檀今河東多有之齊人諺曰上

山斫檀檟榼先殫

檟一作挈

詩義疏繫迷一名挈榼 唐

本草繫迷名莢蒾蘇恭云葉似木槿及榆作小樹子如

漚䟽兩兩相對而色赤味甘 廣志繫迷樹子色如糯

粟可食 花木考山野有一等樹名爲沙孤樹人將此

樹皮如中國葛根搗浸澄瀝取粉作丸葉豈大曬乾而

賣名沙孤米可做飯食出蒲喇加國 何氏天啓集永

明寺詩注云柴千樹名因土人所名亦不知何木也詩

云山樹柴與千南客曾不省云最難長大我見刹那頃
太平廣記俱那衛葉如竹三莖一層莖端分條如貞
桐花小類木櫨出桂州 羅浮山記那衛外國樹英花
紅粉至可玩愛 本草別錄澠疏生熊耳川谷一名楊
櫨一名牡荊一名空疏樹高丈許皮白中空時時有節
子似枸杞子冬熟赤色味甘苦末代乃無識者此非籬
援之楊櫨也 林邑記播移樹柯葉發根下虛中森羅
望之似懸髮 庶物異名疏陶隱居別錄云衛矛生霍

山吳普云葉如桃箭如羽蘇恭云莖長四五尺許其幹
有三羽狀如箭翎葉似山茶青色其木亦名狗骨釋名
云齊人曰衛所以導矢也此物幹有直羽如箭羽矛刃
自衛之狀故以爲名 事物紺珠蕤核樹高五七尺莖
間有刺葉似枸杞花白子紅紫似五味子 物類相感
志必栗香樹形如椿生商山殺蟲魚葉擣碎置上流魚
悉暴腮其木堪爲書軸白魚不敢犯之 花木考做打
麻本是一等樹枝落膠汁土內掘出如松歷青樣火點

即著番人皆以此物作燈點照光番船造完則溶此物塗抹於外水不能入彼人多採取賣內有明淨好者似金珀一般若損都盧廝有番人做成帽珠而賣水珀即此物也出蒲喇加國 太平廣記阿驛波斯呼爲阿驛拂林呼爲底欄樹長丈四五枝葉繁茂葉有五出似蜚麻無花而實實赤色類蜚子味似乾柿而一年一熟事物紺珠無石子樹一名沒石子出波斯高六七丈圍八九尺葉似桃而長白花心微紅子如彈丸初青熟黃

一年生無石子一年生跋屢子殼大如指長三寸子如栗可噉 翻譯名義集南印建那補羅國北不遠有多羅樹成林三十餘里其葉長廣其色光潤諸國書寫莫不採用 天中記洛陽翊津橋通翻經道場其道場有婆羅門僧及身毒僧新翻諸經其經本從外國來用貝多樹葉書貝多葉長一尺五六寸濶五寸許葉形似琵琶而厚大橫作行書隨經多少縫其一邊帖帖然 酉陽雜俎貝多出摩伽陀國長六七尺經冬不凋此樹有

三種一者多羅婆力又貝多二者多梨婆力又貝多三者
部婆力又多羅多梨並書其葉部闇一色取其皮書之
貝多是梵語漢翻爲葉貝多婆力又者漢言樹葉也西
域經書用此三種皮葉若能保護亦得五六百年嵩山
記稱貝多葉似枇杷並謬交趾近出貝多枝林中第一
緬甸軍民志有樹類椶高五六丈結實大如掌土人
以麴納罐中而以索懸其罐於實下劃其實取汁流於
罐以爲酒名曰樹頭酒或不用麴唯取其汁熬爲白糖

其葉即貝葉寫緬書用之

嵩山記嵩高寺中有思惟

樹即貝多也如來坐貝多下思惟因以名焉 魏王花

木志思惟樹漢時有道人自西域持貝多子植於嵩之

西峯下後極高大有四樹樹一年三花 酉陽雜俎菩

提樹出摩伽陀國在摩訶菩提樹寺蓋釋迦如來成道

時樹一名思惟樹莖幹黃白枝葉青翠經冬不凋至佛

入滅日變色凋落過已還生此日國王人民大小作佛

事收葉而歸以爲瑞也樹高四百尺下有銀塔周迴遶

之彼國人四時常焚香散花遶樹下作禮此樹有梵名
二一曰賓撥梨婆力叉二曰阿濕曷叱婆力叉西域記
謂之畢鉢羅以佛於其下成道即以道爲稱故號菩提
婆力叉漢翻爲道樹 天台志山有菩提樹相傳西天
梵僧遊化遺此種樹如柿花亦大同未結藥先乃別抽
一葉長指半許潤西指色白而光潤乃結藥於葉下日
則覆子以蔽穢夜則捧子以承露秋社後取子爲珠十
百中必有一二如羅漢者謂之佛頭他處所生則無之

若西天佛菩提樹智藥三歲移植於廣州光孝寺者其樹不花不實經冬不凋葉之筋脉細緻如絹廣人每用此爲燈爲花爲蟬蟲之翼則與此大不相類 酉陽雜

俎巴陵有寺僧房牀下忽生一木隨伐隨長外國僧見曰此婆羅也元嘉初出一花如蓮 遊名山記華山朝元洞下院有老君殿其前婆羅樹數百年物視其子類栗道士云灰之服以酒可愈心痛 益部名物記贊沙

羅樹花在蛾眉山難移樹葉似桤葉葉相讓樹皮如玉

蘭色葱白最潔鳥不棲蟲不生 潛確類書唐天寶初

安西道進娑羅樹狀云此木不庇凡草不止惡禽如得
托根長樂擢穎建章布葉垂陰比月中之丹桂連枝接
影對天上之白榆 華夷花木考娑羅樹出西番海中

潯州官圃一株甚巨每枝生葉七片有花穗甚長而黃
如粟花秋後結實如粟可食正所謂七葉樹也今餘杭
南安寺前二株左右對植甚茂問之土人皆不知其名
一僧乃云相傳娑羅樹番僧所植者此不謬矣唐李邕

婆羅樹碑云惡禽不集凡草不庇東瘁則青郊苦而歲不稔西茂則白藏泰而秋有成是也第以段成式之博雅而曰花開如蓮則大悖耳其樹詳於佛書維摩詰經有菴羅樹唐會要云菩提樹一名波羅樹葉似白楊即思惟樹一名成道樹西域記名畢鉢羅又雙樹名婆羅樹其花名婆羅法今所稱婆羅法門也蓋婆婆音同故互言之耳今月中樹影皆曰閻浮山婆婆樹影即此歐陽永叔婆羅樹詩云伊洛多奇木婆羅舊得名常於佛

家見宜在月中生 解醒語至元間馬八兒國入貢菴
羅樹十株花葉似棗實似李味佳 一統志真臘國有
婆田羅樹花葉實俱畧似棗又有歌畢陀樹花似林檎
葉似榆而厚大實似李 花木考黎州通望縣有銷樟
院在縣西一百步内有天王堂前古柏樹下有池
池南有娑羅錦樹三四人連手合抱方匝先生花而後生
葉其花盛夏方開謝時不肯而墮宛轉至地其花藥有
綿謂之娑羅綿善致鬱茂違時枯凋 霏雪錄娑羅蜜

樹如荔枝樹差大皮厚葉圓有橫紋小枝附樹身而生
一枝含數實花落實出大如斗皮亦似荔枝有刺類佛
首螺髻之狀肉若蜂房近子處可食與熟瓜無異而風
韻過之如肥阜核大亦可煑食味似豆春生秋熟交人
珍之 海槎餘錄波羅蜜樹類冬青而黑潤倍之幹至
斗大方結實多者十數少者五六顆皆生於根幹之上
狀似冬瓜外結厚皮若栗蓬多棘刺方熟時可重五六
斤去外殼內肉層疊如橘囊以其甘如蜜故云 國憲

家猷南滇夷島產木有堅如石文橫銀屑者夷名曰伽陀羅余愛其堅又貴其異遂用作琴 楊慎外集拘尼

陀樹花見月光即開無憂樹女人觸之花方開婆羅婆樹其實如蠶 事物紺珠波羅奢華葉青色華有三色

日未出時則黑日正中則赤日沒則黃樹汁染皮氎名紫礦 西京雜記上林苑有白銀樹黃銀樹扶老樹金

明樹搖風樹鳴風樹琉璃樹離婁樹 華夷花木考紫

鉞樹出真臘國呼爲勒佉亦出波斯國樹長一丈枝條

鬱茂葉似橘經冬不凋三月開花白色不結子天大霧
露及雨雪濡其樹枝條即出紫銖波斯國使烏海及沙
利深所說竝同真臘國使折衝都尉沙門陀沙尼拔陀
言蟻運土於樹端作窠蟻壤得雨露凝結而成紫銖崑
崙國者善波斯國者次之 李紳詩注琪樹垂條如弱

柳結子如碧珠三年子乃熟每歲生者相續一年者綠

二年者碧三年者紅綴條上璀璨相間

一統志
作金松

王世

懋游匡廬山記寶樹在上大林寺去天池輿行可四里

而遙幾及山麓矣樹有二其一亭亭道旁扶疏四垂妙
好端正若浮屠所畫瓔珞琪樹者相傳一異僧自西土
移來近忽出一癭作人狀僧輩以爲大士像云其一生
澗旁枝葉覆蔭根出石間泉瀲瀲流其上樹之美故讓
道旁者而所據勝不啻過之 七修類藁予友烏鎮王
天雨濟爲橫州州判嘗云橫之馴象衛指揮殷貫家有
盆樹一株高可三四尺幹葉皆紫黑色葉小類石楠質
理細厚問於主人曰鐵樹也每遇丁卯年則花開四瓣

紫白色如瑞香較少圓耳一開累月不凋嗅之有草氣
予以諺以事難成者則曰須鐵樹開花然則果有此樹
耶 華嚴經如雪山頂有藥王樹名無盡根 酉陽雜

俎沒樹出波斯國拂林國人呼爲阿𡵚音姓樹長丈餘皮

青白色葉似槐而長花似橘花而大子黑色如山茱萸

酸甜可食 北史琉球國居海島多鬬鏤樹似橘而葉

密條纖如髮之下垂纖鬬鏤皮升雜毛以爲衣 事物

紺珠纒花樹出天方國如中國大桑其花一年三發長

生不枯 酉陽雜俎婆律國有婆律樹高八九丈大可

六七圍瘦者出龍腦香香在木心肥者出婆律膏膏在

木端齊敷樹出波斯國亦出拂林呼爲齊盧

湯兮反

樹長

二三丈皮青白花似柚極芳香子似楊桃六月熟西域

人壓爲油以煮餅果如中國之巨勝也阿勃參出拂林

國長一丈餘皮青白色葉細兩兩相對花似蔓菁正黃子

似胡椒赤色研其枝汁如油以塗疥癬無不瘥者其油

極貴價重於金槃拏檣波樹出波斯國亦出拂林國拂

林呼爲羣漢樹長三丈圍四五尺葉似細榕經寒不凋
花似橘白色子綠大如酸棗其味甜膩可食西域人壓
爲油以塗身可去風痒

格致鏡原卷六十六